



Kabarett „Sachsenmeyer & Co.“
09224 Chemnitz
Feenweg 11

Hauptspielstätte:
Kabarett-Kiste (im Hedwigshof)
An der Markthalle 8
09111 Chemnitz

Bestell-Telefon: 0371 - 694 77 11
www.sachsenmeyer-kabarett.de
e-Mail: sachsenmeyer@t-online.de

20. Kalenderwoche – ab 15. Mai 2011

Bin dod

Ja, dor Bin Ladn muss nu jedzde ährlisch zugähm - bin dod! De Amis hams nach zähm Jahre geschaffd, dähm öborschdn Feind in de ehwischn Jachdgrinde zu bugsiern. Zähm Jahre! Solange ham die dähm gesuchd! Wahrscheinlich wie bei blinde Kuh - mid vorbundne Oochn!

Nee, dor CIA is werglich dor besde Geheimdiensd wo gähm dud - zähm Jahre, um een zu findn, dähr in Bagisdahn hoggn dud un Däumschn drehd. Wo doch niemand gedachd hädde, dass dähr in Bagisdahn is! Das ham doch alle gewussd!

Nu hamse dähm jednfalls offgedriehm un hingerischded. Eenfach so - buff beng! Wie im wildn Wesdn - ohne Vorhafdung ohne Anglaache ohne Brozess! Ehm eschd ameriganisch!

Wobei - dähm Ohbahma hädsch das gahr nisch zuggedraud. Beim Dschorsch Dabbljuh Busch... - nee, da häds misch nisch gewunnord. Dähr is ja so eene Kauboynaduhr! Abor dor Ohbahma...?

Un dähr Ohbahma had sogahr am Fernsähor zugeguggd, wie das abgeloofn is! Un womeeschlich had dähr am Ende ooch noch selbor gesachd - Feuor frei!

Nascha, es dun ehm bald Wahn sein in Amerika... und wenn de disch da hervordun kannsd... als wie e eschdor Ami... dähr de Bisdole am reschdn Flegg drachn dud... - da hasde schon e Haufn Blusbunkde gesammlt! Bei de Amis! Die missn dähm ja wählm!

Nee, dor Ohbama is da schon sähr schlaue gewähsn. Dähr had sich dähn Bin Ladn solange offgehohm, bissor dähn obdimahl vormarkdn konnde! Buff beng!

In Deuschland däde ja nu sowas ieborhaud nisch denkbahr sein - een eenfach so umleeschn! Un wenn dähr ooch e baar dausend Leide offm Gewissn ham dud... - dor Reschdsschdaad is e Reschdsschdaad un da duds ehm so Reeschln gähm. Schbielreeschn! Keene Dodesschdrafe!

E Rischdor aus Hambursch had ja de Angela sogahr angezeischd..., ja unsre Bundesganzlorin had dähr angezeischd, weil die gesachd had, se däde sich frein, dass dor Bin Ladn erschossn wordn is. Da dud e deuschor Rischdor die anzeischn! Un womeeschlich dud sich ooch noch e brofilierungssischdischor Schdaadsanwald findn, dähr de Anglaache geeschn de Angela erhehm dud! Isch meene, ooch e Schdaadsanwald dud Wärbung brauchn. Un wenn dähr da geeschn de Bundesganzlorin schdänkorn kann... - das bringd Bunkde! Beschdimmd dud sich eenor findn!

Jednfalls in Deuschland häds sowas nisch gähm kenn. Eenfach abgnalln! In Deuschland häddn se dähn zwanzisch Jahre vorgähblich gesuchd... es dud ja keene Schdasi mähr gähm!... dann häddn se weidore zwanzisch Jahre off de Auslieferung gewarded, dann weidore zähn Jahr Brozess... dann Vorurdeilung off Bewährung weeschn Unzureschnungsfähischkeid... Einlieferung in eene pschyschadriscche Glinigg... un wenn dähr dann nisch schon lange von alleene geschdorm sein däde... währ dähr Bin Ladn beim erschn Freigang widdor abgehaun... nach Afghanisdahn. Dschiß!

Eduard Sachsenmeyer